


TEZAU LITURGIC

28 MAI

SLUJBA SF. CUVIOS- MĂRTURISITOR IRACLIE MOTIAH DE LA ISK-KULSKI



MOSCOVA, 2000



Служба

преподобноисповеднику

Ираклию Иссык-Кульскому

Вечер

На Господи, воззвах: стихиры, глас 6. Подобен:
Тридневен:

Постника доблемудраго, / исповедника
Христова, / в годину гонений страдания
приемшаго, / восхвалим по долгу, вернии, /
преподобнаго схимонаха Ираклия, // молитвы
его в помощь призывающе.

Духа Святаго плодов исполнен бив, / благою
надеждою обогатился еси / и, о вечнем
помышляя, / страдания временная нивчтоже
вменил еси, Ираклие! // Темже со дерзновением
Христа исповедал еси.

Дадесе ти благодать, преподобне отче Ираклие /
не токмо иноческия подвиги подъяти, /
но и во исповедании Христа ради пострадати, /
Емуже ныне тепле молися / Церкви нашей
даровати мир // и душам нашим велию милость.

Слава, глас 8:

Преподобне отче исповедниче славне Ираклие/
ты все упование на Бога возложил еси/ и Той
тя прослави во Царствии Небеснем,/ идеже
со сродники нашими,/ новомученики
и исповедники Российскими,/ верою, надеждою
и любовью Ему угодившими,/ прославляеши
Отца и Сына и Святаго Духа// Троицу
Единосущную и Нераздельную.

И ныне, Богородичен:

Царь Небесный/ за человеколюбие на земли
явися,/ и с человеки поживе:/ от Девы бо
Чистыя плоть приемый,/ и из Нея прошедый с
восприятием,/ един есть Сын, сугуб естеством,
но не ипостасию./ Темже совершенна Того
Бога,/ и совершенна человека воистину
проповедающе,/ исповедуем Христа Бога
нашего,/ Егоже моли, Мати безневестная, //
помиловаться душам нашим.

Вход. Прокимен дне. Чтения три
преподобническая.

Премудрости Соломоновы чтение(главы 5×6)

Праведницы во веки живут, и в Господе мзда
их, и попечение их у Вышняго./ Сего ради
приимут Царствие благолепия, и венец доброты

от руки Господни, / зане десницею покрывает,
и мышцею защитит их. / Приимет всеоружие
рвение свое, и вооружит тварь в месть врагом. /
Облечется в броня правды, и возложит шлем,
суд нелицемерен. / Приимет щит непобедимый
преподобие. / Поострит же напрасный гнев
во оружие; / споборет же с ним мир
на безумныя. / Пойдут праволучныя стрелы
молниины, / и яко от благокругла лука облаков,
на намерение полетят. / И от каменометныя
ярости исполнь падут грады, / вознегодует
на них вода морская, реки же потопят я нагло. /
Сопротив станет им Дух Силы, и яко вихор
развеет их, / и опустошит всю землю беззаконие,
и злодейство превратит престолы сильных. /
Слышите убо, царие, и разумеите, навыкните,
судии концев земли. / Внушите, держащии
множества, и гордящися о народах язык, / яко
дана есть от Господа держава вам, и сила
от Вышняго.

Премудрости Соломоновы чтение (глава 3):

Праведных души в руце Божией,
и не прикоснется их мука. / Непщевани быша
во очесех безумных умерети, и вменися
озлобление исход их. / И еже от нас шествие
сокрушение, они же суть в мире. / Ибо пред
лицем человеческим аще и муку приимут,

упование их безсмертия исполнено./ И в мале наказани бывше, великими благодетельствовани будут./ яко Бог искуси я, и обрете их достойны Себе./ Яко злато в горниле искуси их, и яко всеплодие жертвенное прият я./ И во время посещения их возсияют и яко искры по стеблию потекут./ Судят языком, и обладают людьми, и воцарится Господь в них во веки./
Надеющиися Нань разумеют истину, и вернии в любви пребудут Ему./ Яко благодать и милость в преподобных Его, и посещение во избранных Его.

Премудрости Соломоновы чтение (глава 4):

Праведник, аще постигнет скончаться, в покои будет./ Старость бо честна не многолетна, ниже в числе лет исчисляется./ Седина же есть мудрость человеком, и возраст старости, житие нескверное./ Благоугоден Богови быв, возлюблен бысть, и живой посреде грешник преставлен бысть./ Восхищен бысть, да не злоба изменит разума его, или лесь прельстит душу его./ Рачение бо злобы помрачает добрая, и парение похоти пременяет ум незлобив./ Скончався в мале, исполни лета долга. Угодна бо бе Господеви душа его, сего ради потщася от среды лукавствия./ Людие же видевшие и не разумевше, ниже положше в помышлении

такое./ Яко благодать и милость
в преподобных Его, и посещение во избранных
Его.

На стиховне стихирь, глас 2:

Егда умалися истина в земли нашей/
и множество неверных восташа на Церковь
Христову,/ в безумии своем глаголющих:/ что
нам Господь есть?/ Тогда ты, преподобне отче
Ираклие,/ безбожныя твоим исповеданием
посрамил еси// и память их погибе с шумом.

Стих: Исповемся Тебе в правости сердца,/
внегда научити ми ся судьбам правды Твоея.

Егда прииде Господь испытати люди Своя,/
блаженна ты раба и бдяща обрете,/ смирением
и добродетельми украшена,/
преподобноисповедниче Ираклие всечестне./
Темже многими ты дарования обогати// и яви
нам молитвенника тепла.

Стих: Пойте Господеви, преподобнии Его,/
и исповедайте память святыни Его.

Егда обыдоша ты гоняции неправедно,/
преподобноисповедниче отче Ираклие,/ тогда
поминал еси слово Господне:/ несть раб болий
господа своего,/ аще Мене изгнаша и вас
ижденут./ Темже, блаженства изгнанных

правды ради сподобился еси// и молишися
о спасении душ наших.

Слава, глас 6:

Приидите, вси вернии,/ достойно воспоим отца
преподобнаго,/ сей бо, подвиг страдания
и исповедничества совершив/ и последи
благочестно пожив,/ Богу в мире душу предал
еси/ и от сущих zde к вечным жилищем
преставился еси,/ / идеже молится о душах
наших.

И ныне, Богородичен:

Творец и Избавитель мой, Пречистая,/ Христос
Господь, из Твоих ложесян прошед,/ в мя
Оболкийся,/ первыя клятвы Адама свободи./
Темже Ти, Всечистая,/ яко Божии Матери же и
Деве воистинну,/ вопием немолчно:/ радуйся
Ангельски, радуйся, Владычице,/ /
Предстательство и Покрове и Спасение душ
наших.

Тропарь, глас 2:

Преподобноисповедниче отче Ираклие,/ во дни
гонений безбожных на Церковь Христову/
скитания, страдания и скорби Христа ради
претерпел еси,/ и ничтоже разлучи тя от любве
Божия./ Таже, благочестно в мире пожив,/

свидетельствовал еси Господа Иисуса Христа, //
Егоже моли спастися душам нашим.

Ин тропарь, глас 5:

Исповедниче Христов, преподобне отче
Ираклие, / приял бо еси крест и последовал еси
Христу, / и вся учил еси поклоняться Творцу, / в
Троице Единому Богу, / и ныне обрел еси на
небесех мзду трудов твоих, / и пред престолом
Бога Вышняго стоиши, // и молишися о душах
наших.

На утрени

На Бог Господь: тропарь тойже.

По 1-м стихословии седален, глас 4:

Многая страдания мужественне претерпевая, /
советы безбожных разорил еси / и, от славы
постнической в славу исповедническую
восходя, / сугубым венцем от Подвигоположника
увенчался еси. / Темже моли о почитающих тя.

Слава, и ныне, Богородичен:

Недвижимое утверждение веры / и упование
наше во обстояниих, / Богородицу песньми
почтим: / радуйся, Православия ограждение, /

радуйся, земли нашей покрове, / радуйся,
Невесто Невестная.

По 2-м стихословии седален, глас 7:

Кто достойную похвалу принесет подвигом
твоим, преподобне страдальче Ираклие /
Воздержанием бо себе украсив, / исповеданием
Христу угодил еси, / обаче, неключимаго раба
евангельски себе помышляя, / даже до конца
живота твоего в законе Господни со смирением
поучался еси.

Слава, и ныне, Богородичен:

Стена и покров еси, Владычице / и пристанище
небурное всем, в бедах сущим, / и к Твоему
заступлению с верою притекающим. / Темже
и мы усердно вопием Ти: / соблюди нас
в Православии и единомыслии, Дево Пречистая.

Величание:

Ублажаем тя, преподобноисповедниче Ираклие, /
и чтим святую память твою, / наставниче
монахов // и собеседниче ангелов.

Псалом избранный:

1 лик: Терпя потерпех Господа, и внят
ми, и услыша молитву мою (Пс. 39:2).

2 лик: Постави на камени нозе мои и исправи стопы моя (Пс. 39:1).

1 лик: Смирях постом душу мою (Пс. 34:13).

2 лик: Полунощи востах исповедатися Тебе, седмерицею днем хвалих Тя (Пс. 118:62, 146).

1 лик: Неправду возненавидех и омерзих, закон же Твой возлюбих (Пс. 118:163).

2 лик: Утрудихся воздыханием моим, измыю на всяку ночь ложе мое, слезами моими постелю мою омочу (Пс. 6:7).

1 лик: Исповемся Тебе в правости сердца, вегда научити ми ся судьбам правды Твоея (Пс. 118: 7).

2 лик: Избави мя от гонящих мя, яко укрепишася паче мене (Пс. 141:7).

1 лик: За словеса устен Твоих аз сохраних пути жестоки (Пс. 16:4).

2 лик: Искусил мя еси, и не обретеса во мне неправда (Пс. 16:3).

1 лик: Изведи из темницы душу мою, исповедатися имени Твоему (Пс.141:8).

2 лик: Бог мой еси Ты, и исповемся Тебе всем сердцем моим (Пс. 127:28; 137:1).

1 лик: Благо есть исповедаться Господеви, и пети имени Твоему, Вышний (Пс. 91:1).

2 лик: Исповемся Тебе в век, яко сотворил еси, и терплю имя Твое, яко благо пред преподобными Твоими (Пс. 51:11).

По полиелеи седален, глас 1:

Яко истинный подвижник, преподобне отче Ираклие, / страдания и гонения от безбожных претерпел еси / и Христа небоязненно исповедал еси. / По сих же, в мире благочестно пожив, / яко самовидец новомучеников Российских, люди в вере утвердил еси. / Ныне же, во Царствии Божии наслаждайся жизни вечныя, // моли спастися душам нашим.

Слава, и ныне, Богородичен:

Едина крепкая Предстательница роду человеческому, Богородице Дево, / непрестанно моли с новомученики и исповедники Российскими, / Егоже родила еси паче естества Бога Слова // спасти землю нашу, в нейже имя Твое восхваляется присно.

Степенна, 1-й антифон 4-го гласа. Прокимен, глас 4: Честна пред Господем/ смерть преподобных Его. Стих: Что воздам Господеви о всех, яже воздаде ми. Всякое дыхание: Евангелие от Луки, зачало 64.

По 50-м псалме стихира, глас 6:

Преподобне отче Ираклие,/ ты первее,
от страстей себе очистив,/ слезами частыми
и въздыханьми многими/ дух кроток и незлобив
стяжал еси/ и, послежде страдания многая
претерпев/ плод исповедания принесл еси./
Ныне же, предстоя Святей Троице,/ моли,
да помилует нас// по велицей Своей
милости.

Канон, глас 6.

Песнь 1

Ирмос: Яко по суху, пешешествовав Израиль/
по бездне стопами,/ гонителя фараона / видя
потопляема,/ Богу победную песнь поим,
вопяше.

Припев: Преподобне отче Ираклие, моли Бога о нас.

Страдания и подвиги твоя, преподобне отче Ираклие, / яко трапезу духовную днесь предлагаеши / сыном верным Церкви Русския.

Поты постническими и исповеданием Христа / землю нашу удобрив, исповедниче Ираклие, / к Небесным селением возшел еси.

Укрепи Господь в страданиях преподобнаго Своего Ираклия, / да колеблемыя в вере исповеданием вразумит / яко хотением не хотяй смерти грешных, / но еже обратитися и живым им быти.

Богородичен: Рабское приношаю Ти моление, неразумный аз / и к Твоему прибегаю благоутробному милосердию: / не отвержи мене, Пречистая.

Песнь 3

Ирмос: Несть свят, / якоже Ты, Господи, Боже мой, / вознесый рог верных Твоих, Блаже, / и утвердивый нас на камени / исповедания Твоего.

Агнца Божия проповедаая, / страдания за Христа, яко агнец, кротко претерпел еси, преподобне отче Ираклие, / темже о камень исповедания твоего безбожныя преткнушася.

На камени благочестия утвердився
и вечнующаго наслаждения взыскав,/
непоколебим в гонениих пребыл еси, Ираклие
крепкодушне./ Сего ради причастники
Царствия Небеснаго и нас сотвори, поющих тя.

Во исповедание веры, яко в броню крепкую,
облеклся еси, Ираклие,/ и, воин Христов
непобедимый явлься,/ словом Божиим, яко
мечем обоюдоострым, враги посрамил еси.

Богородичен: Дадесе нам милость Тобою,
Богородице/ Царь бо и Владыка мира из Тебе
воплотся,/ страсти нас ради претерпе
и спасение дарова.

Седален, глас 4:

Ненавидящий Господа посрамил еси,/ иже
хотяху тя, преподобноисповедниче Ираклие, от
Христа отлучити и смерти предати./
Ты же, к Богу ум твой вперив,/ яко птица, сети
ловящих избавился еси/ и в кровы Небесныя
возлетел еси,/ идеже, в лице новомучеников
и исповедников Российских пребывая, //
молишися о спасении душ наших.

Слава, и ныне, Богородичен:

О, Всепетая Богородице Владычице,/
преподобных похвало, исповедников венче,/

Ангелы славимая и человеки воспеваемая, /
и всего мира дивная Помощнице, // избави
Церковь Христову всякаго обстояния, Единая
Благословенная.

Песнь 4

Ирмос: Христос моя Сила, / Бог и Господь, /
честная Церковь / боголепно поет, взывающи: /
от смысла чиста о Господе празднующи.

Узы и страдания Христа ради претерпел еси,
преподобне Ираклие, / слово бо крестное бысть
тебе крепость и сила. / Темже, мучительства
страстей избегнув, / любви Божия достигл еси.

Шуия части моли избавити нас, чтущих
тя, Ираклие, / яко добре за Единого Праведного
пострадал еси, / Иже венцем славы украси
тя и части святых сподоби.

Терпением вооружився, / потекл еси
на предлежащий ти подвиг,
преподобноисповедниче Ираклие. / Егда
же безбожнии восташа, прещений их не убоялся
еси / и непоколебимь пребыл еси.

Богородичен: Древа вкушение мертвая
содела, / жизни же Древо из Тебе явльшееся,
Пречистая, воскреси мя / и райския сладости
наследника сотвори.

Песнь 5

Ирмос: Божиим светом Твоим,
Блаже, / утреннюющих Ти души любовью озари,
молюся, / Тя ведети, Слове Божий, / истинного
Бога, / от мрака греховнаго зывающа.

Яко сын дне, во свете заповедей Христовых
ходил еси, отче Ираклие, / и душу твою
подвигом исповедания освятил еси, / ныне
же почести по достоянию от земных приемлещи.

Грехи юности и неведения страданием твоим,
преподобне Ираклие, яко плевелы, исторгл еси, /
в юг же сея слезами божественными, / вечныя
жизни класы радостию ныне пожинаещи.

Увяде в страданиях доброта телесе твоего,
преподобне, / обаче светлость душевная
благодатию Святаго Духа возсия. / Моли
прилежно о почитающих тя.

Богородичен: Правду и Избавление, Христа, нам
рождши, Пречистая Дево, / естество праотца
от клятвы свободила еси.

Песнь 6

Ирмос: Житейское море, / воздвигаемое зря, /
напастей бурю, / к тихому пристанищу Твоему

притек, вопию Ти: / возведи от тли живот мой, /
Многомилостиве.

Промыслом Божиим направляемь, / на воде
покойне воздержания и послушания воспитался
еси, преподобне отче Ираклие, / темже бурю
безбожия во Отечестве нашем / неврежденно
преплыл еси.

Исполнися на тебе глагол Христов: / аще Мене
изгнаша и вас ижденут, / темже, уготовав душу
твою во искушение, / многая страдания,
поношения и скорби претерпел еси.

Скитания и страдания не разлучиша тя от любви
Божия, Ираклие досточудне, / помози и нам
в любви пребывать / и едиными усты и сердцем
Бога славить.

Богородичен: Родила еси, Пречистая Дево,
за благодать Соединившагося с человеком, /
на Негоже не смеют чини ангельстии взирати. /
Того моли прилежно спасти рабы Твоя.

Кондак, глас 2:

Яко звезда новая Церкви Русския явился еси, /
терпеливодушне Ираклие
преподобноисповедниче, / Христа Бога
прославляя / и в нощи безбожия путь верным
указуя. / Темже молим тя: / испроси нам,

сродником твоим, / в вере Православней
утвердиться // и спастися душам нашим.

Икос:

Подвиги монашеския первее прием, отче
Ираклие, / таже исповеданием славным узы
страстныя вконец расторгл еси, / и, яко птица,
избавлься от сети ловящих, / высоты духовныя
достигл еси и многим путь спасения показал
еси. // Ныне моли спастися душам нашим.

Песнь 7

Ирмос: Росодательну убо пещь / содела Ангел /
преподобным отроком, / халдеи же опаляющее /
веление Божие / мучителя увеща вопити: /
благословен еси, Боже, отец наших.

Вси новомученицы и исповедницы Российстии
прославляют Тя, Господи, / с нимиже
и преподобноисповедник славный Ираклий Тебе
предстоит / и молится за землю нашу.

Утеши тя Господь в день печали / и от страданий
жизни многотрудныя к Царствию Небесному
возведе. / Сего ради ныне в радости
прославляеши Бога отец наших.

Мужеством и крепостию душу твою украсив, /
верность Христу в житии твоём сохранил еси /

и, многия скорби претерпев, вечнаго покоя достиг еси, / идеже прославляеши Бога отец наших.

Богородичен: Бога плотию родила еси, Всенепорочная, Единая от Троицы, / Емуже вси поем: / Боже, благословен еси.

Песнь 8

Ирмос: Из пламене преподобным росу источил еси / и праведнаго жертву водою попалил еси, / вся бо твориши, Христе, токмо еже хотети. / Тя превозносим во вся веки.

Егоже отроцы в печи прославиша, / Того и ты в пламени страданий исповеда, усердно взывая: / да благословит тварь вся Господа / и превозносит во вся веки.

Внегда скорбети ти, услыша Господь твоя болезни / и десною Своею рукою покры, / еже не опалитися ти огнем искушений / и верну до конца пребыти, взывая: / Господа пойте и превозносите Его во вся веки.

Отца, Сына, и Духа Святаго, Троицу Единосущную и Нераздельную, / житием твоим исповедал еси, преподобне Ираклие, / помози и нам подвигом добрым подвизатися, / течение жизни совершити и веру непорочну сохранить.

Богородичен: Егда приидеши во славе судити
всяческим, / десным мя овцам сопричти,
Владыко, грешнаго, / Матере Твоея мольбами, /
да Тя славлю во веки.

Песнь 9

Ирмос: Бога / человеком невозможно видети /
на Негоже не смеют чини ангельстии взирати, /
Тобою же, Всечистая, явися человеком / Слово
воплощенно, / Егоже величающе, / с Небесными
вои / Тя ублажаем.

Славу во испытаниих единому Богу воздал еси, /
преподобноисповедниче Христов
приснопамятне, / сего ради и Той тя в лице
новомучеников и исповедников Российских
прослави.

Нищетою вольною и страданием за Христа
очистився, / сосуд благопотребен явился еси,
преподобне отче Ираклие блаженне. / Темже
за землю нашу не престай молитися,
приснопамятне.

Мира суетнаго удалився, / горе сердце имел еси,
отче Ираклие, / сего ради помощь подаде
ти Христос / и терпением обогати. / Емуже ныне
в радости со всеми святыми предстоиши.

Богородичен: Воистинну превыши всея твари Ты еси, Владычице, / Бога бо, Творца всех, родила еси плотию. / Темже Тя Предстательницу имамы / и Тобою спасение улучшить надеемся.

Светилен:

Светодавец Христос Бог наш, исходы утра и вечера красивый, / Света Невечерняго тя, преподобноисповедниче Ираклие, сподоби. / Темже, во светлостех святых пребывая, / и нас светом незаходимым просвети, // да, в радости ликующе, прославим Свет нам Показавшаго.

Слава, и ныне, Богородичен:

Дивно и неизреченно Рождество Твое, Богородице, / Имже спасла еси род человеческий, / темже молим Тя: / светом незаходимым нас просвети, // да, в радости ликующе, прославим Свет нам Показавшаго.

На хвалитех стихиры, глас 4:

Божественным желанием распалаяся, / мира суетнаго отрекся еси / и, Божиим Промыслом водимь, / Христа небоязненно исповедал еси. / Егоже ныне моли, преподобноисповедниче Ираклие, // спастися душам нашим.

Исповеданием веры истинныя / душу твою украсил еси, / страданием и подвиги добрыми / правило веры и образ благочестия нам явил еси. / Темже тебе ради, преподобне Ираклие, / Бога усердно прославляем // и молимся, спастися душам нашим.

Христовым незлобием вооружився, / яко добр воин подвизался еси / и, образ верным показуя, / за гонителей молился еси. / Сего ради ныне Престолу Божию предстоиши / и поминаеши любовию почитающих память твою, // преподобноисповедниче Ираклие.

Слава, глас 6:

Все отложив житейское попечение, / Небеснаго Отечества возжелел еси, / сего ради, угождая Господеви, / в преподобии и правде подвизался еси, / в годину же лютую чада Церкви Русския утверждая, / венцем исповедничества украсился еси. / И ныне молишися, преподобне Ираклие, Христу Богу // о спасении душ наших.

И ныне, Богородичен, глас тойже:

Богородице, Ты еси лоза истинная, / возрадившая нам Плод живота, / Тебе молимся, молися Владычице, / со страстотерпцем, и всеми святыми, // помиловатися душам нашим.

Славословие великое и отпуст.

На Литургии

Блаженны от канона, песни 3-я и 6-я.
Прокимен, глас 7: Честна пред Господем, /
смерть преподобных Его. Стих: Что воздам
Господеву о всех, яже воздаде ми? Апостол
к Галатам, зачало 213. Аллилуиа, глас 6: Блажен
муж, бояйся Господа, в заповедех Его восхощет
зело. Стих: Сильно на земли будет семя его.
Евангелие Луки, зачало 24, Причастен: В память
вечную будет праведник...

